

Ilinniartitaanermut, Kultureqarnermut, Timersornermut Ilageeqarnermullu Naalakkersuisup tikilluaqqusilluni oqalugiaataa

Asasakka atuarfiit pisortaasa isumasioqatigiinnerannut peqataasut – Ilinniartitaanermut Aqutsisoqarfiup atuarfiit pisortaannik isumasioqatigiissitsineranut tikilluaritsi.

Covid-19 pissutigalugu killilersuinerit atorunnaarsinnerisa kingorna atuarfiit pisortaasa isumasioqatigiissinneqarnerannut siullermut tikilluaqqusillungalu peqataasinnaanera nuannaarutigeqaara. Saqqummiinerit oqallinnerillu malinnaaviginissaat qilanaarivara, pingaartumillu qilanaarivara kommunini meeqqat atuarfiini suliat pillugit paasisaarlungalu tusagaqarnissara.

Sulisussanik ilinniarluarsimasunik inuiaqatigiit annertuumik pisariaqartitsipput. Inuiaqatigiit imminnut pilersorsinnaassuseqartut namminersortuusullu anguniassagutsigit, tamarmik – suaassuseq, sumit kingoqqisuuneq tunuliaqutigisarluunniit apeqqutaatinnaq – assigiimmik naleqartinneqarlutik inuiaqatigiit ineriartornerannut tunniussaarlutik misigissappata nutaanik eqqarsartariaqarpugut. Ilinniartitaaneq annertunerusumik inissaqartitsisoq, pineqartunullu qaninnerusooq minnerunngitsumillu ataqatigiinnerusooq pisariaqartippaput.

Inissaqartitsineq meeqqap ilinniartitaanermik naapitseqqaarnerminniilli misigisariaqarpaa, tassalu meeqqerivimmi. Inissaqartitsineq tamanna meeqqat atuarfianni kingornagullu ilinniagaqarnermi ingerlaqqittuassaaq. Atuarfigut ilinniarfigullu tassaassapput siunissamik takorluukkat pikialaaqqaalerfii, ineriartortinneqarfii piviusunngortinneqarfiilu, aamma tassaassapput meeqqat inuusuttullu kikkulluunniit peqataatinneqarfii aamma takorluukkaminik anguniakkaminillu angusaqarnissaminut tapersorsorneqarfii.

Uagut - maanna maaniittugut tamatta - ima inissisimavugut, meeqqanik inuusuttunillu neriuuteqalersitsillutalu takorluukkaminik piviusunngortitsinissaannut kaammattueqataasinnaalluta. Kisianni neriuuteqalersitsinnarlutalu takorluuilersitsissanngilagut – aamma ilikkariartornermi sammisaqarnerit sinaakkutigisaat ingerlaavartumik nalilersorlugillu nutartertuattariaqarpagut. Ilinniartitsinikkut neqeroorutigisatta ullutsinnut naapertuuttuullutillu pitsaasuunissaat ilungersuutigiuartariaqarpaput, meeqqat inuusuttullu tamarmik peroriartorluarnissaminut ineriartorluarnissaminnullu periarfissaat ikorfartorluarneqartuaqqullugit.

Meeqqat atuarfiata atuagarsornikkut ilinniutit ilinniutinullu tunngasut kisiisa atuartunut atuartittassanngilai. Nipilersornikkut eqqumiitsuliornikkullu piginnaasaqarlualerumaartussat, aalisariutini naalaganngorumaartussat, ilinniartitsisunngorumaartussat, assassornermik ilinniagaqarumaartussat, IT-mik immikkut piginnaasaqalerumaartussat, takornariaqarnermik suliaqarumaartussat, professorinngorumaartussat il.il. atuarfiup isumassarsittarlugillu perortittassavai. Ilaatigullu taamaaliorsinnaavugut atuarfik pillugu inatsisip atuartitsinerup nikerarnerusumik pilersaarusiornissaanik siunnerfiisa atorluarnerisigut aamma pilersitsiffiusunik atuartitsineri periuseqarnikkut, atuartunik ilikkagaqarusulersitsisunik aamma ineriartortuarnissaannik ilikkariartortuarnissaannillu kaammattuisunik.

Isumaqpunga atuartut assassoriaanerusunik mernguernartunillu soqutigisaqartut ullumikkornit suli annertunerusumik tapersorsorsinnaagigut, atuartitsissutit pilersitaqarfiusut mernguernartullu

pingaartinnerunerisigut, taakkununga ilanngullugit timersorneq silamilu sammisassat. Tamanna assersuutigalugu pisinnaavoq atuartsissutit akimorlugit ingerlatsinikkut, atuartsissutit arlallit ataatsimoortinnerisigut atuartup ilikkariartornissaminut periarfissai kajumissusaalu tapersersorlugit. Kisianni atuartsissutininik ilinniartitsineq naammanngilaq.

Atuarfik tassaassaaq toqqissisimanartoq, meeqqat tamarmik ataqqineqarlutillu ingerlalluarfigisaat – nakkarsaaffiunanilu uumisaariffiunngitsaq. Tamatumunnga atatillugu neriuppunga pimmatiginnittarneq akiorniarlugu periusissiaq nutaaq kommunit ilassillaarsimassagaat, killiffinnilu tamani ataatsimooqatigiiffinnik toqqissisimanartunik pitsaasunillu pilersitinissamik takorluukkat tapersersussagaat – meeqqat inuusuttullu tamarmik inissaqartinnissaat anguniarlugu.

Ukioq manna ukiut 20-t qaangiupput, Inatsisartunit tamarmiusunit isumaqatigiiffiusumik atuarfimmik iluarsartuusseqqinneq Atuarfitsialammik taaneqartoq pillugu peqqussutissap oqallisigineqarlunilu akuersissutigineqarneraniit. Peqqussut atuutilerpoq 2003-mi, taamaalillunilu 2023-mi inatsisip - ukiut ingerlanerini annikitsunik allannguuteqartarluni - atuutilerneraniit ukiut 20-nngussapput. Tamatumunnga atatillugu Naalakkersuisut pilersaarutigivaat 2023-mi meeqqat atuarfiannik soqutiginnitsit assigiinngitsut atuarfik pillugu ataatsimeersuartinniarlugit. Ataatsimeersuarnermi oqallisigineqassaaq, qanoq iliorluta atuarfik meerartatsinnut kinguaariillu tulliinut sulii pitsaanerulersissinnaaneripput. Naatsorsuutigaarput ataatsimeersuarneq 2023-mi septemberimi ingerlanneqassasoq.

Taama oqaaseqarlunga tikilluaqqoqqippassi – nuannersumik pissarsiffiulluartumillu isumasioqatigiinnissassinnik kissaappassi.